

踏莎行 香島道晚眺

杜佩儀 香港

岸草迷烟。江蘆飛絮。殘陽留得吟鞭駐。詩魂馳逐晚晴天。天涯海角秋如許。遠浦人歸。遙汀雁聚。濛濛暮靄迷江樹。等閒消春客中愁。疏星已照秋隄路。

蝶戀花 夜宿吳園

前人

寄跡林泉堪避俗。鎮日狂遊。更向烟霞宿。落葉半牀花滿屋。吳園應似愚公谷。風月雙清吾願足。蝶夢沉酣。那管黃梁熟。懶向豪華相競逐。詩懷幽冷無榮辱。

前調 大埔海濱遠眺

前人

不管鄉關何處是。海角烟波。盡日饒詩意。沉醉西風秋正媚。詞人此際銷魂來。天外殘霞增艷麗。遠水縈迴。歷亂流紅紫。收拾江山圖畫裏。放懷莫問身何寄。